


# CELEBRACIÓN EN OS COTOS (na casa)

3-4 de xullo do 2021

## XIV DOMINGO DO TEMPO ORDINARIO



NON MÁIS  
VIOLENCIA  
DE XÉNERO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
COA NATUREZA MALTRATADA  
E CON RESPONSABILIDADE PERSOAL ANTE A COVID-19



## 1.- ENCONTRO EN FAMILIA

### SAÚDO DE BENVIDA

🎵 *Unha xuntanza de amor*

#### *Celebrante*

Benvidos sexamos todos a esta celebración da nosa fe. Reunímonos para compartir a vida de Xesús e a nosa en familia.

Cremos moitas veces que Xesús, predicando e facendo milagres, foi ben admitido por todos e non tivo momentos difíciles. Pois hoxe o evanxeo móstranos que isto non foi así. Aparte dos fariseos, que sempre buscaban calquera motivo para acusalo, porque o que dicía deixáboas en mal lugar, tamén no seu pobo Xesús foi rexeitado, era un veciño máis, e nada máis.

Nas nosas vidas tamén temos a experiencia de que cando queremos facer algo ben, ser coherentes, atopamos moitas veces a incompreensión dos que están ao noso lado e nos coñecen. Apreciamos sempre o que ven de fora e non valoramos a quen convive connosco.

Imos celebrar a nosa fe e queremos darnos conta do importante que é valorar ás persoas que comparten ao noso lado todos os días e facémolo no nome do Pai e do Fillo e do Espírito Santo.

## ACTO PENITENCIAL

**Celebrante:** *A presenza de Xesús no medio de nós faise realidade cando somos capaces de poñer en valor todo o que hai de bo á nosa beira. Deamos aprezo a cada un por si mesmo e non polo que ten ou por onde vive. Así debe ser, pero non sempre o facemos tan ben, por iso queremos pedir perdón.*

### Monitor/a:

- Perdón, Señor, polas veces que vivimos cos ollos abertos para aprezoar o de lonxe, e con eles pechados para non ver o de bo que temos á beira. Señor perdoa por non a abrir os ollos
- Perdón, Señor, polas veces que falamos de conciencia ecolóxica, e logo non somos capaces de sentir a grandeza da natureza que nos rodea en Os Cotos. Señor perdoa por non aprezoar estes montes
- Perdón, Señor, polas veces que non somos coherentes na nosa fe, e non nos sentimos parte da Igrexa feita nesta comunidade parroquial. Señor perdoa por non dar unha man

**Celebrante:** *Deus todopoderoso teña piedade de nós, dos que teñen un lugar no noso corazón e na nosa vida, e dos que se senten criticados e marxinados por calquera causa. A todos nos conceda o Señor o seu perdón e nos leve á vida eterna. Amén.*

## ORACIÓN PROPIA DO DÍA

**Celebrante** *Rematamos a primeira parte da celebración presentando no silencio o que rebule no noso interior. Hoxe facémolo dende a incompreensión do que fixeron e fan algúns deses rapaces (e non tan rapaces) en Mallorca.*

*(silenzo)*

### Celebrante:

Deus, Noso Pai,  
pola humilde vida do teu fillo Xesús  
fixéchesnos partícipes do teu perdón.

Nós queremos acollelo, queremos sentilo á nosa beira, e con El da nosa man concédenos a túa santa alegría, e lévanos a ter parte da felicidade eterna. Pedímoscho a Ti, Pai, por Xesucristo teu fillo, que vive e reina por sempre eternamente. Amén

## 2.- PROCLAMACIÓN DA PALABRA DE DEUS

**(sentad@s)** a palabra de Deus proclámase dende o ambón

### Monitor/a:

*Escoitaremos no Evanxeo a decepción de Xesús pola falta de fe dos seus veciños. Escoitarémolo tamén queixándose daquela xente de Nazaret pola rebeldía para aceptar a Boa Nova.*

*Sorprendeuse da incredulidade que demostraban.*

## LECTURA DO LIBRO DO PROFETA EZEQUIEL

Mentres me estaba a falar, entrou en min un espírito que me puxo de pé, e escoitei o que estaba a falar.

Díxome:

- Fillo de Adam, eu voute mandar onda os fillos de Israel, onda un pobo de rebeldes que se reviraron contra min -eles e mailos seus pais-, que pecaron contra min, ata o mesmo día de hoxe. Estes fillos, ¡que duros son de cara! ¡Que obstinados de corazón! Voute mandar onda eles, e vaslles dicir: "Así fala o Señor, Iavé". Deste xeito, eles -escóitente ou rexéitente, pois son casa rebelde- han saber de certo que hai un profeta no medio deles.

### Palabra do Señor

♪ 7 *Andarei na presenza do Señor* SALMO

(en pé) Mc 6, 1-6 EVANXEO

## PROCLAMACIÓN DO SANTO EVANXEO SEGUNDO MARCOS

Daquela, Xesús, foise para a súa vila, acompañado polos seus discípulos.

Cando chegou o sábado, empezou a ensinalos na sinagoga. E moita da xente que o escoitaba dicía abraiada:  
- De onde lle veñen a este todas esas cousas?.

Que sabedoría é esa que lle ensinaron, e como pode facer tantos milagres pola súa man? Non é este o carpinteiro, fillo de María e irmán de Santiago, Xosé, Xudas e mais Simón, e as súas irmás non viven aquí connosco?

Estaban realmente escandalizados.

Pero Xesús díxolles:

- Non hai profeta máis desprezado que na súa terra, na súa casa, ou entre os seus parentes.

E non puido realizar alí ningún milagre, fóra dalgunhas curacións, que fixo impondo as mans. Estaba sorprendido por aquela incredulidade. E adicouse a andar polas aldeas dos arredores, ensinando.

### Palabra do Señor

(sentad@s) gardamos uns instantes de silencio para acoller a palabra no corazón





Non estamos dispostos a aceptar que A PALABRA DUNHA PERSOA COMA NÓS, SEXA A DE DEUS. Deus preséntasenos demasiado humanamente e esta é para moitos a primeira dificultade para crer.



Non nos acabamos de crer que a DEUS SE LLE DESCUBRE NO COTIÁ: nas tristuras e nas ledicias, na debilidade, nas preguntas máis fondas, na busca sincera, nas dúbidas.

DEUS ATÓPASE: nun amigo, nun parente, nun veciño, e sobre todos nos pobres, enfermos e necesitados.

(en pé)

## PROFESIÓN DA FE

**Celebrante:** *Despois de escoitar o Evanxeo, queremos ser coherentes na fe e na vida, e acollendo a Xesús queremos estar á beira da xente dando froitos no camiño de aprezar e non dende as críticas baleiras. Por iso moi orgullosos proclamamos a fe que compartimos:*

***Creo, Señor, pero aumenta a miña fe***

***Monitor/a:***

***Credes en Deus Pai, creador do ceo e máis da terra, que á súa imaxe e semellanza nos convida a acoller aos demais?***

***Creo, Señor, pero aumenta a miña fe***

***Credes en Xesús, o seu Fillo benquerido, que coa súa vida nos demostra que o aprezo e o valor das persoas nace de como se é e non por ser fillo de alguén importante?***

***Creo, Señor, pero aumenta a miña fe***

***Credes no Espírito Santo, que nos alenta a aprezar aos demais polo que realmente son e non polas aparencias?***

***Creo, Señor, pero aumenta a miña fe***

***Credes na igrexa, comunidade viva, que ao xeito de Xesús, somos chamados a tratar as persoas sen facer diferenzas de raza, lingua, cultura ou nacionalidade?***

***Creo, Señor, pero aumenta a miña fe***

## ORACIÓN UNIVERSAL

**Celebrante:** *Oremos a Xesús, e como igrexa no fogar poñamos nas súas mans os nosos mellores desexos para esta sociedade na que vivimos agradecendo todo o que de bo hai entre nós. Oremos dicindo:*

**DÁMOSCHE GRAZAS SEÑOR**

**Monitor/a:**

✓ Porque a pesares das críticas non nos botamos para atrás e cremos que vale a pena facer crible o evanxeo con todos os refuxiados e maltratados. Oremos

✓ Porque non nos importa que nos digan que somos do monte. Ben orgullosos que estamos desta terra e desta natureza. Oremos

✓ Porque non nos importa o que dirán. Cos nosos feitos facemos crible unha parroquia acolledora, aínda que ser cristián non estea de moda. Oremos

✓ Porque non temos medo a estar mal vistos e a que falen mal de nós. Dicimos ben alto que moitos comportamentos non son axeitados neste tempo de pandemia, aínda que se queiran defender en nome da liberdade. Oremos

**Celebrante:** *Escoita, Señor, as nosas pregarías, e énchenos do alento que te levaba a estar sempre á beira dos veciños, aínda que non todos te aceptaran. Ti que vives e reinas por sempre eternamente. Amén.*

## 3.- OS SIGNOS DA COMUÑÓN CON DEUS EN FAMILIA

### NOSO PAI

**Celebrante:** *Sentímonos irmáns de todos, tamén dos que, coma Xesús, hoxe son marxidados pola sociedade. Acollendo o EVANXEO e facendo nosas as palabra de Cristo rezamos con El a Deus*

*NOSO PAI ...*

### SIGNO DA PAZ

**Celebrante:** *Xesús acollía e transmitía paz e esperanza a todos. Coma El sexamos tamén nós esperanza e paz nestes momentos de pandemia e dificultade, sabendo que a paz faise dende a igualdade, faise con respecto, faise con tolerancia, faise con todas as mans atrevidas para coidar, faise con aprezo aos de lonxe e tamén e sobre todo aos de cerca. Fagámolo.*

### NON COMULGAMOS

### PERO ESTAMOS EN COMUÑÓN

**Celebrante:** *Xesús acóllenos a todos sen distincións para que nos deamos conta de que todos valemos a pena. Aprecemos todo o que de bo hai á nosa beira, entre os nosos veciños e veciñas. E sintámonos orgullosos e ditosos por estar invitados a facer crible a Boa Nova do Señor.*

 **Na tardiña baixa da vida**

## 4.- AVISOS E DESPEDIDA

### ORACIÓN FINAL

#### *Celebrante:*

Señor, ti écheshnos na vida co evanxeo. Fai que non deixemos nunca de aprezoar aos que están á nosa beira, de xeito que os froitos do noso camiñar sexan verdadeiros e coherentes con Xesucristo, noso Señor, que vive e reina por sempre eternamente. Amén

*Con Xesús cremos que vale a pena facer evanxeo aprezoando máis e criticando menos aos nosos veciños.*

*Con Xesús queremos facernos cribles e sen medo a ser semente dun mundo que respecta na igualdade e nas diferenzas.*

*Con Xesús queremos dar grazas aos veciños e veciñas da parroquia que non se deixan levar polas aparencias nin polo que dirán.*

*Que teñamos un bo día, unha boa semana,  
e o Señor nos bendiga, † nos garde de todo mal  
e nos leve ao seu fogar de vida eterna. Amén.*



*“Xesús sorprendeuse pola incredulidade dos seus veciños”*

*Palabras do evanxeo de hoxe.*